



Kalaallit qimmiat qimuttoq illersorniarlugu kalaallit qimmiannik qimmiutilinnut nerukkaatissarsiutaanut akileraartarnikkut ilangaammik pilersitsisinnaanerup pittaaqutai ajoqqutaalu pillugit Naalakkersuisut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris J. Jensen, Siumut)
(siullermeerneqarnera)

Inatsisartuni ilaasortap Doris J. Jensenip qimmit qimuttut pillugit siunnersuuteqarneranut qujavugut.

Qimmeqarneq assaat paarlaannarlugit pisinnaangilaq, piumassusermilli annertuumik pigisaqarnikkut aalajaallutik soqutigisaminnik ingerlatsisut annertuumik nersorumavakka, ataqqinninnermillu annertuumik peqarfigalugit.

Qimmeq qimuttoq ukiorparujussuarni manna tikillugu paarilluarneqarnermigut isumagilluarneqarnermigullu uumasinnaajuannarsimavoq. Ineriartornerup kinguneranik qimusseq snescooterinit iningerneqaleriartormat eqqaanngittoorusunngilara oqaatigissallugu: qamutit motoorillit aserorlutik ingerlasinnaajunnaarsinnaapput, qimmerli ingerlajuannassooq tammarnaviarnanilu.

Demokraatit siunnersuuteqartoq isumaqatigaat, qimmit qimuttut kulturitsinnut pingaaruteqartuusut, taakkulu pitsaanerpaamik pigiinnarnissaannut sulisariaqartugut. Demokraatit ilisimavaat, qimmit qimuttut piniarnermut atorineqartarnerat kinguariartortoq ineriartornerup malitsigisaanik. Kulturili taanna naleqqussartuutuvoq, isumaqarpungalu tassuuna ernumassutissaqanngitsugut.

Assersuutitut taaginnarsinnaavarput qimmit qimuttut takornariaqarnermut atorineqarnerisa siuariatorsinnaanerat. Nalornisiginagu oqarsinnaavugut, takornarissanut qimussertitsineq pilerinartorujussuusoq. Mittarfiliornerit kingunerisaannik nunatsinnut takornarissanik suli amerlanerusunik tikittoqartalernissaa ilimantarluinnartuuvoq. Ilisimavarpullu takornarissat aammalumi nunaqavissut qimussernissartik assut soqutigisaraat, tamannalu tunngavigalugu ilimagilluinnarparput, qimmit qimuttut tassuuna suli siunissagissaaqisut.

Siunnersuuteqartup uuminnga siunnersuuteqarnermini kissaatigaa, nalunaarusiortoqassasoq qimmiutillit nerukkaatissanut atuinerisa akileraartarnikkut ilanngaammik pilersitsinermi pitsaaqutit ajoqutaasullu oqimaaqatigiinnerat takuniarlugu. Tassani Demokraatit paasissavaat, qimminut nerukkaatit inuussutissarsiornermut atorineqarneri ilanngaatigineqarsinnaareermata. Taamaattumik siunnersuummi pineqarsimassaaq qimminut, inuussutissarsiornermut atorineqanngitsunut. Taamaattumillu siunnersuut taama isikkoqartillugu itigartipparput.



Taamaakkaluartorli oqaatsit ukua ingerlateqqikkumavakka: Ilumoorpoq qimminut nerukkaatissat akitsoriartormata, tamannalu amerlasuunik qimmeqartuulluni unamillernartoqarsinnaasarpog. Assersuutigalugu qimmillip oqaluttuuppaanga pisiniarfimmiittunik qimmit nerukkaatissaanik atuisuugaanni qimmeqarlualaraannilu qaammammut 10.000,- koruunit tungaannut naleqartartoq. Taamaattumillu iluassagaluqisoq akikillisaavigineqarsinnaasaraanni.

Ilanngullugu oqaatiginngitsoorusunngilara nuannaarutigigakku pisortat suliffeqarfiutaa KNI qimuttunik qimmeqartuaannarnissamik pingaartitsilluni iliuuseqaqataasimammatt. Ilaatigut Neqi a/s suleqatigineratigut nerukkaatissanik nunatsinneersunik tuniniaasalernikuullutik, kiisalu Avannaata qimussersuaqartarneranut tapersersuisarlutik.

Isumaqarluinnarpunga kulturikkut eriagisatta pingaartitattalu suuneri ilisimaarilluaqqissaartariaqarigut. Naalackersuisugut kaammattorumavakka sulii ullumikkornit annertunerusumik inuiattut ataatsimoorfigisakkatsinnut pingaartitsillutik ukkassinnerunissaanik – eqqaamassuarpummi ulluni ataatsimoorfigisatsinni naapikkaangatta qanoq anersaakkut timikkut tarnikkullu pisuunngortigisarnersugut.

Taamaattumik naalackersuisut kaammattorumavakka suliffeqarfiutiminnut qimmit qimuttut pillugit pingaartitsinerminnik ersarissaassuteqaqqullugit. Kisiannili qulaani eqqaasakka aammalu Naalackersuisullu akissuteqaatiminni allassimasaat tunngavigalugit aaqqiissutit allat ujartornissaanut soqutiginnippugut.

Assersuutigalugu nunat avannarliit kulturikkut tammattaaliuineranut nunat akimorlugit aningaasaliisarneri qiviarfissaasoraakka.